

甌

甄

洞

藁

甌甌洞藁卷之十四

武昌吳國倫著

始安張鳴鳳校
新安方尚贊

五言律詩一百一十九首

夏日庭卉初集二首

逕僻塵踪遠庭空暑氣微
移花新遶砌待雨獨披衣
石上虬龍舞枝間燕雀歸
蘭芬挹堪飽何用北山薇

其二

落日下庭柯幽懷奈爾何
捲簾蒼藹逼移席暗香多
天意從踈放兒曹狎笑歌
向來青鬢色虛逐畏途過

齒病自嘲

自結談天舌虛含齧雪心乾坤妨吐納風雨助呻吟
肉食慚無補唇亡慮轉深甘同犬馬老藥餌故難任

桐江哭羅太史二首

已正黔婁被猶縣董氏惟心喪門客禮手澤世人私
六闕存恩數三經藉羽儀桐江風雨夜還似別君時
其二

斯文元不沒夫子竟何之馭鶴應無意傷麟獨此時
雲封內史宅江遠大儒祠有 詔求巖穴誰爲 帝
者師

自橫浦度大庾嶺寄謝馮汝言方伯二首

橫浦窮江界中原入望孤罪應投絕域身漸老泥途
馬首蠻雲合崖間越鳥呼寄情章貢水千折下彭湖

其二

庾嶺橫天畔居然楚越分巖泉飛作雨谿霧湧爲雲
羸馬無時歇哀猿幾處聞故人憐逐客誰似大馮君

中宿峽二首

揚舲三十里不及聽猿鳴山角凌雲勢湍縣赴海聲
豈知鱸穴近忽傍屨樓行何處崑崙竹仍藏 帝子
名

其二

夾岸千峯合中流一葦通經過憑絕險疏鑿自神工
濺瀑成珠海飛巖掛葦宮蛟螭莫相訝匣裏劍光雄

宿石門山下

越南星是客海上石爲門欹枕潮初落停橈月已昏
戍煙連絕島漁火閉深村野哭聲何自偏銷萬里魂

望海二首

扶桑不可見十日轉重溟島削三山紫波涵百粵青
積流天地合元氣古今停便好乘槎去馮誰問客星

其二

望海天無際登樓亦壯哉屢隨春霧散雪擁暮潮來

六闕支鼇背千珠吐蚌胎聊舒萬里目長嘯起銜杯
陽江道中

白骨平丘壠非關地不毛炊煙百里外戍堞數峯高
處處聞蠻鼓時時攬佩刀暮穿烏石逕草樹亦腥臊
高州雜詠五首

粵南天欲盡風氣迴難持一日更裘葛三家雜漢夷
鬼符書辟瘴蠻鼓奏登陴遙夜西歸夢惟應海月知
其二

灌木生公府停車白鹿馴茶供蕉實美卷拭荔圖新
不是嬰羣盜何妨臥遠臣登城窺赤水龍氣未全伸

其三

金虎馭炎方銅魚跨海洋按圖窺斥鹵分壘壯封疆
暑却椶櫚拂風清荳蔻香還珠無異政合浦自生光

其四

萬事供長嘯三山畢遠遊渴操龍井杓酣擊鑑江舟
旅夢迷青瑣新詩慰白頭棲棲不自解寧爲俸錢留

其五

卉服降偏國文身辯爾曹幾家圍虎落一旅控烏號
夜逐愁心永星懸殺氣高泉泉有餘滴亦可助投醪

病中答曹有卿參政二首

迢遞蒼梧使傳書問逐臣萬山馳瘴癘一語破風塵
只苦論文遠那知抱病新壯心隨處折何以報情親

其二

自失中原路夷猶瘴海邊病依山鬼臥窮得故人憐
白髮親蠻俗丹心老戍煙南征有銅柱誰紀伏波賢

楊別駕署亭小飲

隙地纔如掌栽培擬茂園峯陰隨卷幔海色到憑軒
急雨澆花過歸禽掠竹喧坐來幽意愜潦倒任芳樽
過李明府西岸竹亭

飛蓋出平林停軒步綠陰不關無暑氣先自少塵心

水抱雙亭落梅開萬竹深怪來彭澤令百里厭橫簪

東齋新成卽事四首

城枕蠶江曲堂開署閣東總無神爵異不忝素絲風
尺地何常主浮雲此誓同閒來隱几臥猶似鹿皮翁

其二

石上花新集朝來雨亦宜不知身萬里且得酒盈卮
笛裏聞蠻曲絃中按楚詞徘徊秋夜永烏鵲浪相疑

其三

退食循迂逕披書面短墻從容修卉石彷彿在林塘
只苦烽煙迫兼之簿領妨隔門呼小吏毋入蓋公堂

其四

瘴霧無時黑，秋花亦自紅。
僅堪居海叟，猶復比園公。
促膝羣星近，支頤萬態空。
向來虛運甕，只合老湘東。

立秋東齋夜坐

不道秋期至，猶然暑氣重。
關山流海月，河漢隱邊烽。
署倚枕，榔關盤兼苜蓿供。
總勞書越絕，萬里一浮蹤。

七夕東齋與二客對雨

七夕偏逢雨，雙星莫渡河。
人間怨機杼，天上阻風波。
對酒青楓落，看雲白髮多。
乾坤俱逆旅，何處獨悲歌。

重泛鑑江

竝有滄洲興寧辭載酒頻石門雲氣落沙磧雨痕新
砧杵千家思兵戈萬里身幾時蓮葉舫江漢坐垂綸

小函谷

在高州西關外

重巖新設險一旅獨當關飲馬江流細懸旗石影閒
天威行萬里使節領諸蠻只訝青牛度常瞻紫氣還
吳士至自浙江得徐子與書

越客貧如故蠻山到亦奇潮雞渾不解海鳥若爲期
榻與南州下書從孺子移且憑秋署月取醉莫停卮
答子與見寄三首

北海堂初避中山篋已盈縱橫憑劍客偃蹇自書生

不解鄰鈇惑翻憎卞玉名知君有同病萬里劇含情

其二

萬里書能到三山夢欲飛憂生隨藥裹忍死臥戎衣
淚迸鮫人落心先鴈使歸誰同泛江漢黃鵠是吾磯

其三

汝問高涼臥何如客九夷居然安虎尾不復理蛾眉
珠浦光初合瓊崖俗漸宜中原一搔首白髮故垂垂

與吳士二首

汝爲羅浮至羅浮海霧中茹芝人不見採藥路難通
樹染鯨鯢血巖藏虎豹宮且收溟渤淚歸臥五湖東

其二

念我真浮海飄飄萬里從將窮南紀勝一寄北冥蹤
季子金難繼虞卿璧未逢送君惟斗酒醉殺百蠻峯

哭熊元乘中丞五首

時在潮州新破海寇率于行間

嶺海鳴朱鷺魚龍避絳騶將星那遽隕蠻霧未全收
碑墮英雄淚天懸社稷憂角巾歸是夢猶擬赤松遊

其二

自君嬰紱冕何處不臨戎名起諸艱後心危百戰中
南人瞻白鉞天子錫彤弓許國齊生死銅標自漢功

其三

幾日潮陽道郵書問勒兵千艘揮羽破一旅插貂行
豈意來凶問翻令泣凱聲悲風殷地發望海不勝情

其四

四嶽咨初定元戎命獨專誓同蒼兕決經異白猿傳
力已疲三捷功寧負九遷君王如遣祀高塚象祁連

其五

海色凌霜府秋陰向夜臺軍符仍氣象藥裹竟塵埃
部曲吞聲散 朝廷拊髀哀潮陽十萬戶猶憶詔言師
來

夜分視城悵然有作二首

比屋誰安枕登城意黯然萬山豺虎據一劔斗牛懸
柝振微明月車迴欲曙天如雲新募士擐甲待烽煙

其二

可是專城吏無能罷枕戈遠人窺帝力中夜起夷
歌海浪千鯨湧山烽百雉羅攬槍落未盡刁斗竟如
何

題溫泉

泉在電白縣境

豈是桃花水看來境忽迷地蒸疑煉石湯沸欲燃犀
景謝驪宮勝名堪駱谷齊誰當憑一勺細濯海天西

臘月署中見桃花

海際天無雪春前桃已花披軒疑錯錦泛酒忽成霞
物候三山異鄉心萬里賒明年武陵渡何得遂移家
寄高若齡給事

一別俱垂老江湖夢獨親尺書題寇盜雙淚掩參辰
南越遊非計東山隱未真何當買舟去一問剡溪津
同白將軍視師海上因贈

說劍無常術臨戎見異才海曾驅鱷去山復射狼來
赤羽分蠻壘黃金築漢臺鷹揚但自勉鏡曲爲君裁
電白南樓望海

一縱登城目蠻煙百粵通斷山橫絕海孤閣倚層空
地撼蛟龍鬪潮爭鼓角雄憑軒獨舒嘯萬木起悲風

阻寇

鞞鼓兼天震狼烽徹曙明乞歸無間道抱病且孤城
欲借蠻兵力翻慚郡將名

時檄許西
火攻海寇

弦歌差自遣野

哭正關情

題黃公補漱芳亭

疊石分三島登亭欵衆芳星垂朱實亂雲掛碧蘿長
把酒迎清籟披衣入暗香此中宜得句歌發向誰狂
夏日集黃幼章欣賞亭

半畝偏奇勝孤亭信寂寥綠陰濃護石新瀑細通橋
景與三洲敵詩馮百卉驕我乘看竹興何用主人招
那夏驛卽事

蘚色封階滑榕陰灑院幽夕陽聊駐馬殘雨忽鳴鳩
問俗悲蠻壘匡時負漢箴十年經喪亂野哭幾時休
夏虞卿邀過梁氏園留題

不識西園勝因君秉燭過檻隨江岸曲堂抱水雲多
百卉延書帙羣星散薜蘿松間涼籟發彷彿聽弦歌

園中贈梁氏二生

偶爾來逃暑何知遇兩生移花供倦矚烹茗破餘醒

眇眇青雲器，踟躕白屋情。庭中雙玉樹，光奪浦珠明。

梁氏藁青館雅集

改席旋生月，臨池正聚星。徑分桃竹影，榻遶刺桐青。
坐客傳三賦，名家守一經。誰云浮白處，不似草玄亭。

得歐楨伯文學光州書

歐生苦落落，何物解憐才。佩憶芙蓉結，詩將苜蓿裁。
一官老淮汝，萬卷臥風雷。海上兵如蝟，誰傳尺素來。

重遊七星巖二首

風有看山癖，茲山況不羣。郊原青黛合，霄漢紫芒分。
壁暗吹陰雪，崑虛宿古雲。總無塵跡到，卮酒坐斜曛。

其二

拄杖行山麓，攀蘿啓洞扉。
坐驚雲石變，觴挹乳泉飛。
鶴立仙人鏡，鯨翻織女機。
丹爐不復焰，猶有紫芝肥。

珠江舟中與戴使君夜談

江海茫無際，扁舟二大天。
暮雲依島嶼，寒雨散菰蒲。
對酒商歌發，看天旅思孤。
豈無千里意，相顧老窮途。

與唐寅仲秀才

可怪唐寅仲，儒冠漸白頭。
峯雲高自臥，海鳥狎相求。
一識三閭賦，能輕萬戶侯。
知君久懷壁，偃蹇向予投。

寄訊戴朝賓

嶺海仍留滯誰應慰歲寒赤心聊解印華髮更彈冠
濁酒從人載新詩避客看時情紛滿眼且莫問長安
春日遲劉德甫司理不至却寄

見道趨還郡前旌望轉迷車驅防穴虎艇發候潮雞
節序迎途改峯陰入署齊老親猶強飯知不厭羈棲
病中問羅叅戎病

同憂復同病風雨正關情障海功難就還家夢不成
帳中誰侍藥枕上獨籌兵努力扶雙劍毋虛白馬盟
再寄用晦

浮海數千里新詩每憶君蘭蘅紛可佩鴻鴈自爲羣

力已兵中盡名空老去聞相思南浦月夜夜嶺頭分
雷州西湖亭偶憩

海氣嬰城滿塵襟出郭開誰亭湖水上獨棹野航來
灌木撐奇石涼雲覆古臺乾坤何主客風景自徘徊
五月五日黃別駕招遊湖亭馮將軍在焉

十畝西湖勝波光一太虛淺莎停浴鶴踈藻過遊魚
欲雨嵐先合迎風暑忽除相逢炎海客猶問辟兵書
得德甫書再寄二首

見道求賢使弓旌遍草萊如何徐孺子獨臥豫章臺
佩學雲衣結門臨水鏡開不知蓬徑裏曾有問奇來

其二

多少停雲意傳書到海涯歲諳詩有法天幸老無家
南浦飛晴雪洪崖宿暮霞便招梅福隱何用續懷沙

厓門弔古四首

宋相陸秀夫負少
帝昺流死此石下

雙厓縣東海一水怒排空國難身何惜親征氣尚雄
魚龍吞玉璽麋鹿臥行宮舉目都遺恨蕭蕭起颶風

其二

王師二十萬海戰不曾歸獨有厓山石能憐宋事非
中原趨左袵南越竄朱衣辛苦諸賢佐荒祠倚夕暉

其三

千尺厓門浪前朝恨未平總無恢漢力猶作撼胡聲
社稷餘三傑興亡自兩京至今東海日如吐赤心明

三傑謂陸秀夫文天祥張世傑也

其四

興亡俱一夢延佇獨堪悲士失藏孤策厓懸滅宋碑
鎖江原自困航海復何之得死甘魚腹那從虜騎馳

次雷州作二首

馬跡窮炎服雷陽海市通沙昏巢百雉潮起飲雙虹
衫葛難勝暑掀髯欲御風迢遙金掌露北極五雲中

其二

誰紀南征蹟，祠名兩伏波。海移經捷地，星掣舊提戈。
塞外降旗伏，沙頭戰艦羅。此時宣帝德，不數漢功多。

夏日同楊別駕再過梁氏園

千樹圍山館，谿雲入座幽。總無煩暑到，況是隔年遊。
摘荔傾團扇，傳醪繫小舟。半酣微雨過，炎海忽清秋。

喜雨三首

大火流金石，殷憂力未勝。側身窺赤漢，跂足想層冰。
風鼓重溟立，雲兼四嶽升。萬靈將一雨，寧獨洗炎蒸。

其二

霖雨天膏澤均霑遍草萊敢云隨轍至却爲洗兵來
暮景懸巫峽蠻煙淨越臺千門理溝瀆南貉未爲災

其三

逸閣都雲氣無從辨大虛迷茫過石燕沾灑應桐魚
癯暑心初定憂天病忽除朝來問田父蓑笠遍郊墟

酬沈嘉則二首

絕域無鴻到傳書海色驚流言予未省孤憤汝難平
老漸安殊俗窮堪避盛名論交滿天地誰及布衣情

其二

方外論高義途窮見汝賢淚緣思舊盡文借解嘲傳

一諾無金石羣情任歲年浮雲行萬里相望獨依然
天妃祠偶憩

天外招神女江濱葺小祠佩環何處落鸞鶴使人疑
石擁璠雲勢榕分蔽日枝憑軒亦風景茄鼓動堪悲
賀許孟中生子四首

紫氣從天日氤氳度越臺月銜珠蚌吐雲護玉麟來
何客知英骨他時自異才一經行有託且進掌中杯
其二

孔釋如期送菴神異代看百年家造起一日旅愁寬
侍子裝文祿嘉賓獻繡筆光輝映扶木不數謝家蘭

其三

抱子無言晚傳家亦有神
泥洼能種異升穴鳳雛新
適意忘羈旅函書慰老親
門庭詩禮足何用卜芳鄰

其四

白鴈茗溪望青驄瘴嶺驅
夢中升匹練掌上拭明珠
剪角遙相藉分甘老自娛
不妨歸計緩萬里壯懸弧

小至夜作

玄陰已受謝客子尚飄蓬
病待微陽起愁當萬里窮
寢兵期未應獻履頌難工
莫問雲何色春回自漢宮
家難後聞用晦遣使以布
二十疋見恤妻孥賦

此寄謝

何意遭家難居然見友情
倉皇妻子計慷慨布衣盟
色借秦裘瑩溫同鄰帛輕
可知蘭與蕙偏向歲寒生

除夕戒嚴

黯澹思鄉淚蹉跎許國身
路迷猶作客歲改不知春
鸞鳳棲何擇豺狼擾未馴
東風發楊柳一夜與愁新

元日南城樓閣戰二首

望闕雲初霽馮城霧尚寒
戎衣關歲暹羽檄妬辛盤
旗影烏蠻合兵威赤壁看
裸夷宵未遁何日枕能安

其二

盜密真如雨城孤幸有天妖氛迷白日戰鼓入新年
技欲穿楊試功難破竹全晚來收一捷父老拜烽煙
人日寇退

除日到人日時時戰馬鳴偶驅蠻嶺瘴如保白登城
虎視關仍險鯨翻海未平且馮諸將力揮淚省春耕
送黃源潔郡博致仕歸南康

宦遊君已倦猶憶及門時萬里浮滄海諸生擁絳帷
兵戈無上策松菊有前期若問歸何意巖間白鹿知
量移貴州二首

嶺外看除目君恩敢厭遲卻憐投杼後猶有賜環

期經術窮無恙塵踪遠亦宜西南通九譯非復舊羅施

其二

十年淹臥閣一日謝專城賦擬浮湘去官同喻蜀行
猿啼諸葛寨烏集夜郎兵只藉脩文力遙伸報情主

江大叅李兵憲枉餞三橋驛奉謝二首

暝霧塞帷合春雲擊軫來壯心橫絕海戰色起荒臺
樽俎非常遇經綸竝異才長當萬里別那得不徘徊

其二

保障無能事遭逢二大夫追陪當客禮緩急藉兵符
罷戰魂初定看春淚欲枯海頭烽燧色明滅傍征途
泃溪雨泊

谿水故縈泃征帆暮復開峯陰波際亂海色雨中來
岸樹聊停棹蓬燈自舉杯醉疑神女過不是夢陽臺

上滇陽峽

在中宿峽之上

二峽遙相望長年百里愁石開神禹穴天入遠臣舟
絕巘飛疑墜驚湍沸不流風生青瘴合應有毒龍遊

南華寺二首

雙林高隱塔一壑遠聞鐘入寺谿流迸看山雲石重

空中飄梵樂象外領禪宗
衣鉢前朝事高僧何處逢

其二

聞道安禪處傳燈自楚歸
獨留金象在曾跨玉龍飛
大地開迦葉番王贈衲衣
曹溪如有意九曲抱煙扉
既度庾嶺先遣一使報家兄

辛苦南洋客三年飽亂離
弱軀存萬死微力破羣疑
雨暗思鄉淚天開度嶺期
知君頻憶弟歸計敢遲遲
雨後發橫浦

急雨過橫浦奔流不可磯
岸投千樹沒舟掠萬峯飛
積靄飄行幔餘寒怯旅衣
亦知江路險心逐楚雲歸

南浦舟中與德甫用晦夜談

繫纜已三宿，攜壺未厭頻。
交情垂老重，時事隔年新。
泉石能生妬，文章只助貧。
夜深聯榻語，牛斗失精神。

南康賀使君道卿偕戴司理子芳攜壺見訪

地主情何極，孤舟繫北風。
江吞五老盡，天遣一樽同。
漁罟星沙外，人家雪浪中。
醉來看瀑布，彷彿坐珠宮。

抵家劉仲將夜過

萬里懸相問，風煙白髮新。
却從歸郢日，重見和歌人。
戎馬肩初息，綈袍意獨親。
中庭月欲散，莫厭酒杯頻。

與仲將談詩

少年曾彩筆，潦倒媿齊名。諸體君能擅，多才晚更精。
目中無敵國，言外有先聲。屈宋何時遇，瀟湘萬古情。
季狂見訪山中

適楚真如約，三年此一樽。兵戈憐老病，日月幸寒溫。
峽雨停蘭棹，湘流掛蓼門。君看浮海賦，悽惻恐銷魂。
輓白貴宗侯

仙路迂難問，王孫去不還。歌鍾曾北里，几杖只西山。
身老八公後，恩優四聖間。天風飄鶴馭，豈復愛人寰。

暑夜酌季狂

三伏氣如火風生一羽微酒中堪散髮花外獨披衣
樹拂星文亂城銜月影歸何當吸清露遠駕玉龍飛
送季狂重遊七臺山

共攬七臺勝君今更獨遊山靈爲舊主行色正新秋
雨洗曾題石雲封竝臥樓卽逢方外士無復問丹丘
病暑簡仲將

一食良自苦當如藥餌何晝眠思雪嶺夜起望天河
三伏爭秋遠分陰瘴暑過聞君亦同病移枕傍松蘿
酬朱邦憲見懷二首

白首堪長別書來更愴神一官身是夢百戰鬼爲鄰

竊祿何奇事關心獨故人秋風三泖畔誰共飽鱸尊

其二

任俠名差著違時謗亦流剖心明楚壁側目視吳鉤
酒泛滄江暮歌回白苧秋只憎招隱處不入剡溪舟

題石處士一谿草堂

石脉分泉細村流遶屋長數峯沈紫翠一勺寫瀟湘
星隱磻谿釣花飛曲水觴夜深雷雨過應有伏龍翔

別趙汝脩

乍好清秋至翻令感別深杯浮千嶂雨帆破五谿陰
酩酊看華髮蹉跎失素心滄浪一片石只合待抽簪

湖上別諸親友二首

平湖三十里緩棹未驚鷗不是憐長別真堪託勝遊
片帆開遠岫雙袂解中流苦爲浮名縛風塵老未休

其二

餞別浮龍浦方舟去復停波搖空影碧石畫水痕青
一飲堪移日何時更聚星遠遊無寸補真負北山靈

泊黃龍洲

江口月初生秋濤萬里驚旅帆龍渚泊漁火雒城明
沽酒來山市傳籌問水程薄遊從此逝浩蕩不勝情

發鄆州別姪子文良

爲汝能憐叔令吾轉戀家長江心萬里一夕鬢雙華
刻鵠書仍戒名駒意未誇開林多種竹相待老煙霞

甌甌洞藁卷之十五

武昌吳國倫著

始安張鳴鳳校
新安方尚贊

五言律詩一百一十八首

蔡景明僉憲招飲分署池亭同子與賦二首

密樹藏孤榭方池鏡遠天
磯分黃鵠細盤鱸錦鱗鮮
景物來三楚風流起二賢
不禁幽意愜酣枕石梁眠

其二

漣漪風不定倚檻獨徘徊
石作支機穩池方濯錦開
暮雲留下榻新月待銜杯
媿我非高士能從孺子來
八月十五夜順甫席上賦得逢字

怪是中秋月當筵照別容十年還此夕何地不浮蹤
世事滄洲定交情白首濃夢中曾命駕寧作浪相逢

過大司徒方公山居留飲

不道尚書第蕭然一徑深帝優存問禮天老度支
心湖上雲連屋花前雪滿簪持杯談往事款款散秋
陰

少司徒姜公岳陽樓餞送

夜堂酣未解載酒復登樓風雨驚長別江山戀舊遊
天空萬葉下日落片帆留何事姜公望能忘上國憂
秦鳴和憲長自滇至

別君何歲月垂老更參辰異域驚攜手長途怯問津
賜衣霜色古佩劍斗文新屈指三朝事那能不愴
神

送秦憲長赴山東

聖皇新卜曆岳牧遠承恩玉筍中朝象金科百吏尊
表風趨大國賜履躡天門欲作東征賦誰同北海樽

集新橋館二首

遶閣雲如水入門山滿堂煙霏生牖闥空翠滴衣裳
石暝猿猶臥松高鶴正翔居然成野趣不解是他鄉

其二

坐上看山好橋頭問酒來浮雲冠蓋集落日管弦催
漢將南征壘羅夷北望臺乾坤何異域萬里獨徘徊
得楚雄金別駕汝介書雅有歸志賦此答之

徼外同爲客君仍萬里餘移家安異俗隔歲問鄉書
裘馬身誰健尊鱸意不虛拂衣如可遂相傍鹿門居
遊唐山洞二首

竝馬出荒城條然野興生却從陰磴入遂與洞雲盟
倚杖看泉脉彈碁就石枰卽同山鬼臥未必旅魂驚
其二

石室雲常凍松扃日易斜偶來探玉笥忽似湧金沙

乳噴千春雪巖樓九色霞坐看瓊蕊落何用餌三花
茹工部禮卿園亭對雪

客有山陰興無妨雪逕迷逕亭花莫辨當檻竹全低
獨鶴衝寒舞羣鳥倦蝶棲遠山看不夜那惜醉如泥
雪後對署中梅花有懷林仲清憲使

獨對空齋裏相看歲欲過花時君不見雪夜興如何
沾幽砌懸冰滴素柯一枝聊寄遠春色渡牂牁
病中對梅花

老幹依殘堞繁花媚遠人爲乘三雪候先作九夷春
遶逕風香細垂堂月魄新強支愁病色向汝覓精神

同諸大夫宴汪評事江亭二首

列榭憑江勝羣公結駟來
逕隨花石遠筵接水雲開
雪乳浮丹洞晴沙護釣臺
隔林峯在戶五柳不須栽

其二

愛客興未已一樽移放舟
松篁披絕岸簫鼓發中流
月跨銅標上春隨錦纜收
却看回棹處猶似剡溪遊

武勝關

雙壁削無地亂峯飛插天
毒龍翻大壑羸馬怯奔泉
江貫山心出雲批石甲懸
當關無一事却是舞千年
抵清平不得遽見山甫中丞先賦一詩奉懷兼

訂金鳳山之約

駐馬山城裏嚴更坐寂寥曾無一水隔其奈美人遙
問禮將從野陳詩合在朝且懸金鳳榻攜我宿雲霄
登溜沙關絕頂

捫石開雲頂臨關俯日華萬峯隨馬駐一劔倚空斜
礪道分青瘴巖泉沸白沙逢人多卉服疑已近仙家
平溪署中看山

幾日空齋裏春山隱自看閉門成主客分席故盤桓
白鳥依雲集蒼龍入雨蟠亦知身是寄取意獨加餐
思兄

遠別意殊悔欲歸魂屢驚頭顱亦解事骨肉誰無情
萬里一行鴈百年雙樹荆春寒不共被風雨何盈盈

飲薛將軍山閣

片地藏幽勝層軒俯石池景含留客意花發解兵時
倚榻涼雲到鉤簾永日移酒酣聞說劔壯氣轉難持

觀聖泉二首

神井殊難測涓涓滿忽除源泉無日夜天地此盈虛
細湧丹砂穴潛分碧石渠山形儼胡鼻誰爲卜仙居

其二

豈是通潮汐須臾不自停乍應旋地軸忽復閉靈扃

玉濺天池碧珠含月谷青浮沈亦吾意何用測圖經
同林仲清憲副飲石蓮峯頭

爲愛芙蓉石披衣到絕巔一峯青自削千葉翠相牽
樹杪行杯出雲心擲杖旋不妨風雨過酣傍列星眠
送方以賢憲副入賀

穆穆明堂闢僊班亦遠臣禁糞 天壽啓盤露 主
恩新萬國懸金鏡千官捧御輪誰將干羽意重向玉
階陳

聞元美憲使起家將入楚遙有此寄

謗後名逾重昂藏楚大夫徵書馳 帝里官舫發姑

蘇豈爲玄纁屈應憐白雪孤斯文占出處努力戒前途

龍場驛壁間見王伯安先生遺筆追歎成詩

海內王夫子夷方亦問津斯文存放逐天意屬經綸
一字神猶王千秋跡未陳相傳浮海事不及問斯人

門人爲先生著年譜頗飾浮海之異心竊疑之故云

謁王先生祠

想像居夷日蠻王半執經澤宮虛俎豆麟閣儼丹青
終古悲長夜遺書炳列星殘碑堪墮淚風雨過羣靈

赤虺河

萬里赤虺河山深莽霧多遙疑驅象馬直欲搗岷峩
筏趁飛流下檣穿怒石過勒郎今莫渡不止爲風波
赤水公署作

突兀巒山合參差雉堞低人家懸碧石公署出丹梯
夜靜水聲亂日高雲氣迷牀頭白塵尾愁絕自提攜
赤水苦熱

何事炎蒸候遨遊赤水邊密雲浮瘴癘長日警烽煙
屋角雙厓墮城心亂瀑懸何當御風去高步雪山顛
過象鼻嶺夜渡落遮河抵閣鴉驛

山形如象鼻礧道擬鸞叢筏渡千厓底車旋萬石中

短亭微上月鳴瀑遠生風白髮悲行險乾坤一轉蓬

蜈蚣嶺

天畔蜈蚣嶺攀躋奈苦辛蜿蜒森百足奮迅起千鱗
石撼風雷怒巖呼鬼魅噴扶筇萬仞外摧折自傷神
還署見紫薇花感而有賦

蓬鬢不勝役庭薇今始花憐人枯榦挺宜暑密叢遮
捲幔分清露開樽泛赤霞須拚百日飲對汝足忘家
請稱紫薇花開
可百日始謝

夏日同諸大夫東亭觀蓮

淥水依城細紅藻近寺幽風亭全辟暑露蓋欲迎秋

錦奪珠宮豔香凌玉井浮東林如可社日傍遠公遊

七月十五夜齋中對月

獨有清秋月偏憐絕域身鴻歸天更遠鳥息露初勻
不寐思金掌長歌抱玉輪江鄉正搖落兒女傍誰親

邵僉憲寄碧雲洞賦至因贈二詩

何意盤江外乾坤更一丘却令驄馬使蚤爲碧雲留
煮石顏堪駐巢松跡故幽種瓜成五色無忝邵家侯

其二

彩筆自神物雲霞遠見分倚棧飛石瀨拂案走峯紋
名與園公寄歌從壤父聞銜杯心賞足只惜未同君

同張道卿夜飲汪評事山洞

主客無相問留歡信所便林光隨秉燭雨氣促移筵
江抱垂綸石巖藏洗耳泉直須拚酪酏高枕洞雲眠
吳大叅壽卿同王閻帥攜酒枉問詩以謝之

閉閣眠猶穩書空歲欲殘君來如饋藥病起一加餐
短髮當樽怯微雲入署寒百憂無日盡珍重此留懽

紅梅

旅署無春事盆梅亦自紅寒條不勝雪密蕾競含風
曉幔丹珠錯宵筵火樹工持杯款相酌幽意若爲同

答王敬美儀部

題書到蠻府念我一何勞慘澹看雞肋參差想鳳毛
畏途行自隘仙關望踰高却問黃金市誰聽白雪操

垂柳

二月看新柳繁條日以舒綠垂雲綽約青散雨蕭疎
笛裏春堪折杯中色不如猶疑漢宮近千縷拂簪裾

櫻桃花

御苑含桃樹花開作雪看誰移荒署裏偏助早春寒
遲素愁金谷垂珠遲玉盤不知蕭士穎何意獨相殘

士穎嘗作伐櫻桃賦
雖云有激竊不取焉

王幼明隱居高真菴屬贈二首

不規遺榮賦誰知好道心巢雲開石室采露入青林
遂與世人絕杳然仙路深浮丘如可遇吾意亦招尋

其二

握手看童面無疑是玉光別來醒寤寐物外擬行藏
書罷青牛去琴鳴赤鯉翔古來得道者棲息太清鄉

題呂仙圖贈周使君

豈是邯鄲枕能令悟太虛雲霞偏異骨木石總天居
百鍊昆吾鏢千言道德書請看箕坐處猶似朗吟餘
偶過茹園再贈

古木蔽城園藤蘿卷四鄰閉門成野趣呼酒見天真

石笥編籀出池華引瀑新無妙室如斗好與白雲親
得沈純甫書却寄

不道番禺令三年借沈郎宦情隨海市詩句敵扶桑
念我仍書札逢人但酒觴雙兔是仙舄只待五雲翔
寄賀少師張相公二百

東壁圖書府蜚英自少年賦疑丹篆合經竝赤虹傳
四十登台座尋常奉御筵始知天帝意藜杖不
虛然

其二

聞道金華殿天顏書接多聽來青鳳曲叶作卿雲

歌魚水心無間鹽梅手自和同風漸環海那得復揚
波

夜過高真菴訪王幼明不值

爲覓遊仙侶重過禮斗壇松雲開閤寂蘿月護高寒
葉落疑捐珮泉鳴憶洗丹盈庭霜似雪莫作剡溪看
寄贈唐使君

見道山中郡民風異昔年網羅無伏雉鼎俎屬烹鮮
四壘烽初熄三農力已專何妨閉高閣長日理朱弦
與徐大同日量移叅政賦寄

拙宦吾兄弟支離已白頭那知萬里外復作一時收

竝駕名猶忝分藩體漸優
七閩雖海國文物視中州
子與得闔子
得大梁故云

別壽卿大參

何意飄零客三年此共君
聯輿朝問俗促膝夜論文
醉采章門月歌停楚峽雲
可堪搖落候風而鴈行分
倒馬坂

天懸倒馬坂瀑瀉飛虹橋
石柱臨關險風輪撼地搖
沙狂日易暝溪毒暑全驕
猿鳥自相怨誰堪旅思遙
楊老站

石駭馬長鳴遭迴百感生
虎寧威李廣羊欲幻初平

無復揚鞭意空勞叱馭聲險巖同世路那得不關情

重過飛雲洞

密樹蒙丹穴虛巖俯紺林重來幽絕境一暢遠遊心
石與雲飛動潭涵月古今風生靈籟發故作老龍吟

九日暮抵田埂坪公館

楓葉迎人落菊花何處開驛亭孤燭動風雨萬山來
寒色生衣袂夷歌送酒杯村中無刻漏永夜獨徘徊
沅州道中雨行

鬢天盡日漏鳥道何時平猿隱石林臥馬銜松葉鳴
山煙忽開闔野潦恣縱橫跋涉不辭險其如羈旅情

辰溪道中喜晴

一月苦陰雨艱難數去程遙看旭日上直比黃河清
山徑仄仍滑野煙寒乍輕五溪歷欲盡始復揚雙旌
武陵夜訪陳贊之太史留酌

歸程難可計月夕況逢君酒釀秦源水庭當楚嶽雲
萬星懸戀闕孤燭坐論文明日還岐路誰能手易分
贈贊之

楚客稱良史還如倚相才經明白虎觀詩奏柏梁臺
賜錦雲霞集褒書氣象回武陵冠蓋里却是爲君開
於信夫使君偕龍氏二文學餞予石泉觀

出餞亦何遠
筵開羽士家
客隨鐘磬入
泉遶薜蘿
斜別酒分瓊液
征衣染石霞
談玄合此地
塵路轉堪嗟
喜元美擢御史
中丞出鎮鄖陽
諸關四首

君恩殊未薄
一歲已三遷
豈是文章力
能回造物權
五兵須節制
羣牧讓才賢
不見羊開府
荆襄片石傳
其二

世路今初泰
吾曹汝最賢
總令推轂晚
猶是著鞭先
楚塞高連峽
秦關險接天
轅門當宛洛
無處入烽煙
其三

武侯人所羨
君自訪隆中
却怪三分業
猶傳八陣雄

皇圖中外合將略古今同誰識脩辭客居然一總戎
其四

三世稱司馬名家古亦稀鼎鐘懸舊服川嶽壯戎衣
檄下諸夷震營行萬馬飛且從黃石去謾擬赤松歸
舟出富池逢梁彥國司理邀飲驛舍

蕭然青雀舫日繫黃龍洲早濕愁遷客踈狂託醉侯
春寒重問酒雪霽一登樓我亦苦行役當樽戀舊遊
許下答劉右史

未入梁王苑先披太傅書驚心千里別搔首十年餘
愛客曾投轄明農嬾曳裾高陽思故態齒髮近何如

王母洞

虎牢爭戰地何自有仙關石穴藏符籙瑤池落珮環
偶乘青鳥至時駕彩雲還欲受長生訣無從遇玉顏

登絃歌臺

天地有通塞斯文無古今不緣陳蔡厄誰識聖賢心
臺迥黃河曲沙荒白日陰絃歌欲盈耳何處起知音

過子由亭

在陳州西湖中

飛蓋遶林坳浮香十里汀却移花外舫同醉水心亭
返照荷爭碧迴波岸轉青相傳蘇仲子寂寞此談經

送吳京兆赴金陵二首

京兆非常秩 天王寵異才 誰爲馮翊重 合有趙張
來 華旆移中嶽 麟符出上台 金陵龍虎氣 此日更崔
嵬

其二

王氣無南北 黃圖自二京 君從高第入 天老重臣名
問俗江湖遍 承風輦轂清 可知分陝日 周召亦同情
中秋集敬美所同丘謙之歐楨伯賦

雨意懸高館 秋陰積遠空 相看羣態盡 猶有一樽同
感事窮偏畏 論文老未工 豈無仙掌月 只在五雲中
過劉仲脩隱居留贈

只在長安市居然遂隱淪門餘羅雀地天老豸龍身
載酒迷花石揮毫役鬼神亭軒足佳趣誰識故侯貧

洪從周管建初夜過

旅館自清夜蹉然聞叩門宦從岐路拙交藉布衣尊
啜茗留談藝焚香坐辟喧欲憑雙彩筆貌我入崑崙

二子並以
詩畫名

燕市八月見賣菊者感而有作

八月華陽道驚逢賣菊人分根雲不斷拭葉露初勻
物候偏燕谷秋陰遲楚臣東籬正蕭瑟立馬爲傷神
同諸君過史元乘金吾新第

新卜長安第堂高卉石幽城雲分綺席宮樹影朱樓
鼎食予真忝弦歌客未休將軍起儒術慷慨話封侯
予將力疾南征敬美適病不能出郭爲別悵然

有賦

爲問君何病相憐我更愁一城分異域幾日是殘秋
枕上黃花老車前白鴈流河梁不攜手別淚向誰收
熊惟登偶客大梁賦此招飲

汝臥鍾山穩遊梁事亦奇魚鹽聊混俗牛鼎未干時
木落夷門盡鴻歸楚塞遲布衣情不淺有酒莫停卮
題伯榮宗侯竹居

弱冠明經術端居萬竹幽爲耽淇水靜不作菟園遊
翰墨雲生石弦歌月滿樓請看劉子駿何忝漢儒流
雪夜宴劉右史宅

興發天宜雪兼之訪戴過不拚長夜飲奈此白頭何
燭下陽阿舞絃中激楚歌空庭月未上玉樹總婆娑
輓朱邦憲二首

濟上一樽酒須臾二十年有懷俱夢寐何地不風煙
室僅留虛白亭今罷草玄斯人難再作東望獨潸然
其二

自得銜杯趣婆娑不解愁定知泉下路猶似醉中遊

草蔓論文社天空望海樓上公銘汝墓何忝是名流

其鄉御史大夫潘公爲
邦憲作銘雅見稱許

過杞得黃實甫文學詩因贈文學故爲元美屬

吏雅見稱賞

采風吾豈敢攬轡此重過晚得丘中士能爲郢上歌
雄心銷筆研傲骨擁嵩河只遇王開府詞名一日多
賦得名駒贈方公子

何來天下馬一顧卽長鳴未試千金足先收萬里名
練飛閭闔影珠汗渥洼精芻秣恩難報寧辭塞外行
訪黃實甫不值

僻巷春能駐衡門日漸春案窺玄草積堂啓白雲封
招隱知何適論文悵未逢還如剡溪棹來往竟浮踪
答徐行甫論詩

吾道誰先覺君才自晚成名高強仕日詩發壯遊情
宛國神駒步齊庭大鳥鳴敢言希竝駕竊已附同聲

贈張德隆德裕兄弟

兩生不應詔偃蹇自儒冠舊業青山在新詩白壁看
美名韋氏杞幽色謝家蘭多少緜袍意非憐范叔寒
張德裕以詩畫見投感而有贈因悼其兄德徵
舊識張公子翩翩老藝林嶽雲將畫手河水滌文心

萬石風如故三珠色已使當年酹花處含淚一招尋
徐行父寓杞忽署中墻崩壞其臥榻僅以身免
爲賦二詩慰之

三川殊未震一木豈難支燕雀驚初寢鷓鴣失故枝
厄從呼吸解軀借鬼神持只怪憂天墜偏逢入杞時
其二

君自明時棟巖墻臥不驚如何穿榻處忽有鑿坏聲
險類妖狐讖安同失馬情無妨考鐘鼓日以慶餘生
重過黃園

僻徑從吾好紆車不厭頻雨苔青漸合風篠翠初勻

興與花神狎情偏地主親當歌雲似雪何異郢中春
鳴臯復有北園之約旋爲雨阻移席于家折花
賞之

正好看花去胡然風雨嗔分來園裏色小作坐中春
蕾欲驚風墮枝偏怯雨新明朝又岐路韶景屬誰親
牧兒病中書報舉女口占一詩安之

汝病猶將父吾衰意抱孫虺蛇寧異夢蘭桂總靈根
設悅門無恙含飴口漸溫遙憐一水隔不共洗兒樽
得女孫後行父有贈率爾奉答

老去稱王父猶然是女孫卑從牀下臥愛亦掌中存

試聽將雛曲寧忘舐犢恩百年誰自料憂喜屬清樽
哭牧兒六首

攜兒依薄祿寢疾竟他鄉造次收書篋叩吟傍藥囊
深恩垂首絕遺語刺心長灑淚都成血悲風起大梁

其二

弱冠耽經術頎然欲丈夫從兄如影響愛弟狎頭顱
捐館心難死還家骨已枯南雲那可望隨地只哀呼

其三

憶汝丰神秀承親色笑多謂堪娛老景豈忽困沈疴
服驥衝泥淖將雛觸網羅良無續命術毀裂奈兒何

其四

伯氏偏憐汝書來問疾頻
蕭疎庭際玉黯澹掌中珍
業許箕裘遠情鍾孝友真
那知新娶婦遽作未亡人

其五

偃蹇吾何適兒偏識父心屬
文思近古誦賦叶成音
弟妹分甘好親朋結愛深
祗今爲異物高館日陰森

其六

汝父年垂暮吾兒日以踈
衰來身欲往夢裏色如初
壁掩新題畫牀翻舊枕
書傷心千里外孤櫬反丘墟
病中酬灌用過視

飄風起沙海僻閣掩斜暉病臥如逃世君來一啓扉
友情分艾切憂色采薪微坐倚牀頭劍相憐未忍歸
江寧王出玉硯一雙見示率爾賦贈

瑩然雙玉硯吐氣白如虹璞自荆山剖文窺魯廟工
染毫分壁水洗墨蕩瑤空無復磷緇患貞心許國同
工兒奔迎弟櫬至三江口覆舟溺而復起書來
令我膽落心悸者數月因成二詩慰之

哭弟何倉卒舟逢巨浪吞已安魚鱉窟猶憶鶴鴿原
照水犀難灼闔南翼忽騫餘生有天幸不必賦招魂

其二

得爾重生信驚予半死心身危知覆載事定想浮沈
合有江神護能無水怪侵馮誰呼急難千里涕盈襟
發輝縣喜道傍流泉作

逕遶蘇門出村村灌百泉波吹雲觸石谿決潦平田
散藻沙痕細經林雨意偏飛流爭赴海涓滴使人憐

酬王子卿論詩

大雅談非易如君賈勇何苦吟無日夜高視有嵩河
敢謂能同調相將屬和歌請看詞苑客拙宦古來多

濟瀆

淪濟從王屋重源百里通由來浮磬出只與濫觴同

玉漱西山脉珠騰北海宮古今嚴瀆祀一勺自神功

盤谷

谷口雲猶昔山陽室已遷狐眠支鼎石草蔓濯纓泉
俗與無懷近銘方有道傳却慚軒冕客垂老未歸田
河內道中聞徐行父由江南還次廩延遂紆車
馳就之夜談卽事

一爲千里別已作隔年期忽漫逢岐路將無是夢思
去來驄馬健南北使星馳獨有樽前月能憐此會奇
阻雨宿榆廂鋪

風雨來何驟泥途漸可航輿人深沒脛候吏苦褰裳

昏黑投荒館支吾臥竹牀無爲從者病顛沛亦吾常
送凌惟和督學貴州二首

三載豫州牧脩文向九夷帝心優復古吾道晚逢
時帳啓蠻王集經橫國士馳洋洋誦章甫何地不尊
師

其二

萬里西南徼因君憶昔遊俗非羅鬼舊兵已夜郎收
玉節專文命銅標激壯猷漢家五尺道風物盡神
州

與門人徐應時論文作

及門方弱冠經術已稱優慷慨凌雲氣蹉跎翺漢籌
早棲安燕雀高步擬驩騶莫訝風雲晚逢時自壯遊
臨川門人曾選甫來見訪席間賦贈

念我輕千里塞裳數問津正愁風浪濶却喜藝文新
神劍終應合遺珠衆所珍古來經世業偏屬固心人

瓶瓶洞葉卷之十九終

甌甌洞藁卷之十六

武昌吳國倫著

始安張鳴鳳校
新安方尚贊校

五言律詩一百二十四首

芝林爲潘中丞詠

潘郎讀書處神草忽爲林
露挹商山秀雲分楚澗深
三花盤紫蓋九色麗華簪
爲卜瑤圖瑞知君調鼎心

松月樓

自是梁園勝登樓玉宇開
閒憑松頂坐忽擁桂輪來
星漢流書牖風濤送酒杯
此中曾授簡何客似鄒枚

賦得手把鐵如意答池士爵考功

向報胡子鍊如意詩考功聞而屬和見寄故

有此答

手把鐵如意冥然有所思紫雲開北望白日駐西馳
忽在山濤札真如鮑叔知摩挲增氣色不復歎衰遲

吳封君六十詩二首

封君景陵人士
望太叅父也

禮樂延陵喬煙霞夢澤居一經開世業 雙闕下天
書賜錦紋成鳳趨 朝佩是魚豈須逢出獵垂老載

周車

其二

再命興南國箕裘自義方門高于氏里俗表鄭公鄉

四世分天祿諸孫擁壽觴共驚蘭桂色偏向竟陵芳
送魏文可郡丞起復北上

征途歲已盡風雪晝陰森未解居廬色寧忘戀闕心
逢予且杯酒回首卽辰參不淺匡時略無須歎陸沈
新鄭道中

立馬具茨野風沙疊古堤溪奔厓斷續雲罨樹高低
不覩三芝秀空聞七聖迷旅情紛欲結鳴鳥故棲棲
新鄭訪少師高相公四首

大隗纔如斗能容上相居君恩優賜杖國禮重
懸車避客軒轅洞逢仙道德書向來調鼎意且復寄

詹爾
卷之二十一
二六六
二六六
樵漁

其二

魚水 先朝事乾坤故晏然憂深馮几日託重委裘
年一 疏心難盡 三宮詔已傳稍聞收相印遂問洛
陽田

其三

野闊洪堤隱厓懸曲洧奔卑仍蕭相宅靜擬翟公門
大藥資難老仙冀屬 至尊安車何日下消息任乾
坤

其四

未叩平津閣泥途忽見收至今慙國士含意向中州
遇自登龍重恩非執雉酬停杯談往事猶抱徙薪憂

臥佛

長夜何時旦惟應臥佛知關係祇樹掩枕就嶽雲支
夢度三千界醒忘十六師傳燈心已死誰辨劫灰時

初春尉氏道中

雪霽風逾勁春寒客始裘驅馳經下邑蕭瑟傍中州
草蔓蓬池逕沙沈菟苑樓百年懷古意都作片雲浮

發大梁二首

曉發大梁城歸裝一羽輕畏途今削迹 明主獨舍

情白簡知何狀黃河未遽清敵裘聊自拭不忝故書
生

其二

遮道何爲者偏憐放逐臣風雲一日變耳目兩河新
世事都長夜歸期及早春慙慙諸父老常作太平民
麻城道中卽事

出境寧三宿西陵是楚天空山迴暝霧壞道響春泉
澗曲常隨馬峯危欲跼爲荒村雷雨迫翻藉館人憐
次麻城劉直卿憲副周子徵使君見訪留別一

首

直羨冥鴻侶賢哉二大夫白雲安儿杖清世托尊鱸
媿我身謀拙逢人雅調孤初衣從爾逝幸不老迷途

大冶值雨作

只只是歸程千山風雨生不眠思獨往延佇劇爲情
想像明河影淒其永漏聲何當收石燕曉色動前旌
喜方仲美至遂與花前對酌

方郎不解事偏問拂衣人雙眼浮雲外孤舟漢水濱
餘年聊頌酒生計有垂綸試覽羣花色能勝幾日春
汝脩仲美竝過小飲

懸輿已不蚤猶及故人期石挺雲中色花矜雨後姿

敝裘持問酒短榻坐談詩卽有猶龍意惟應倦鳥知

花間偶詠二首

爲解花間意樽醪日自呼興來佳客就酣至小童扶
雨葉從沾灑風香忽有無一區聊自廣何用策脩途

其二

名卉無多種新移卽故林如雲供坐翫永日助行吟
宛轉留春事參差散夕陰何妨問奇客載酒數招尋
莊則勸過訪二首

三徑從吾好此生君所知酒杯如可放金石亦堪疑
遶席花如綺垂頭鬢已絲惟應共貧賤不負白雲期

其二

棄擲吾何有，藏身萬卷中。
君來長日語，興至一樽同。
況有雲霞癖，都無禮法攻。
羣花款相媚，涼雨忽濛濛。

郭憲使篤周見訪

南海探奇日，逢君意氣多。
那知乘月舫，亦復叩煙蘿。
握手羣峯峙，論心一雨過。
不煩驚往事，吾道自江河。

詠盆中石山

一勺瀟湘意，雲根插未安。
微茫星乍隕，突兀屨初蟠。
玉筍支靈竅，瓊蓮覆石闌。
却愁風雨過，蘿薜不勝寒。

江漲

江漲懸如峽兼天雨未休居然成巨浸何處陟高丘
室與龍宮接城如蟻垤浮苦無冲舉翼那得不深憂

東署納涼

官署倚城闌吾家亦比隣偶乘明月過旋入晚涼新
露柏陰堪藉風蕉意獨親不煩揮麈尾行坐總無塵
聞羽王夜談往事有感二首

一見開心目頻過醒夢思那知終夕語翻助十年悲
梁獄身垂死燕臺骨尚疑一官纔不絕猶藉主恩
移

其二

半刺起吳州鳴珂帝里遊逢人偏積羽失勢有垂頭
交態窮時見詞名難後收却懸雙淚眼來視九江流
哭趙良才

束髮同師友論年亦弟兄半生常苦別垂老更關情
自汝沈疴久令人夢寐驚招魂嗟不返風雨暗江城
汝脩以芋薯二品見餉走筆謝之

竝自雲根掘籠來土色鮮蹲鴟巴客餌鉞弋漢宮拳
已足供兼饌何妨實四邊同心亦同臭那得不相憐
則勸以宋魚十數頭畜之孟中見遺賦謝

洋洋一盃水不減放生池戲藻金鱗躍分羣火鬣移

總無驚餌態寧有報珠期濠上逍遙者惟應惠子知

答洞庭山人吳橋見寄

有引

風雅久湮有志未逮山人謬以相許則何敢
當懷茲好音願言屬和雖竝談未偶而神賞
斯殷矣

攜手定何日裁書意已親語中無近代江左又斯人
盛世容高枕滄洲穩釣綸夢回千里駕曾問五湖津
同張羽王登山見紫芝獨秀喜而采之

不淺攀躋興春山雲氣平偶隨青羽蓋重采赤芝英

先是此山產芝羽王自作入掌明霞豔沾衣瑞露輕尚山浩歌者

千古共斯盟

飲西巖林間

未厭林塘小幽棲老更便
偶同看竹到旋欲據梧眠
席倚雲間岫杯分石上泉
世情終不解翻得野人憐

舍傍小亭初成卽事二首

環堵不盈畝營亭且避喧
屢移花近席新長薜垂門
病借銜杯遣身從失勢尊
自今容膝處豈復礙乾坤

其二

爲草遺榮賦園居興轉新
短籬常自掩凡卉亦堪珍
坐久雲霞變機忘鳥雀親
攬衣時抱甕不忝漢陰人

泛西湖

十里西湖勝錢塘未遠過水痕侵錦石峯影鬱滄波
進艇隨鷗鷺銜杯入芰荷晚風生谷口清切送漁歌

登鍾成山觀

壑擬藏舟僻山同覆釜圓偶來探異蹟便欲躡飛仙
瀑外流雲合松梢落日懸暝霞蒸石鼎疑吐晉時煙

泊舟梧塘聽泉

繫舟深樹裏箕坐聽鳴泉隱約黃金佩淒清白雪弦
千山都雨意五月已秋天心境杳然寂誰稱洗耳賢

林間小飲

山中暑氣薄，況乃竹林幽。與客宜深入，登高當遠遊。
稻花風向午，桐葉雨驚秋。醉臥依田叟，真堪散百憂。

詠螢火

微命托腐草，吐光疑夜珠。飛揚但咫尺，明滅何須臾。
遶戶作星聚，入林驚雨驅。凌晨不自照，海日升東嵎。

聞田歌

隔壠田歌發，洋洋振碧空。調高無郢雪，思遠卽幽風。
鼓腹聲相答，明農意許同。何當租吏緩，與爾待年豐。

西灣晚棹

一水南湖外，逶迤白石門。鳴榔穿曲澗，排荇入深村。

萬樹中流合羣山落照昏正愁高興盡漁父過清樽
避暑小室

一室幽如洞炎威總不侵兼於塵事絕益戴主恩
深簟擁冰紋細簾回晝色陰拋書轉岑寂倦臥枕鳴
琴

立秋後三日泛舟

秋陽何大烈沈復近煩囂一泛煙波去俄令暑氣消
晚風迴奏笛涼月過鳴橈醉擁羣山臥真同河朔招
送程仲濟還新安

江色動清秋蕭然感滯留朝來聞過鴈夜起問歸舟

興似王猷盡名將范蠡浮齊雲結遐想還擬挾君遊
喜雨東楊使君

賦暑毫方禿納涼樽屢虛行吟楚澤畔消渴茂陵居
雨意朝來足炎威坐自除郊原諸父老歌擁使君車

其二

不是爲霖客誰能請雨來馮夷清大道神女下陽臺
隴黍含膏吐庭花作意開直驅殘暑盡湖上好銜杯
李文仲過訪

汝自茗溪發言循楚嶽遊片雲將蔽舄高浪翼輕舟
野服驚相顧新詩款見投但須傳郢曲不必報吳鉤

秋夕同徐懋弘戶部登寂潭寺

寺與高雲竝，僧疑異域來。
天空潭影淨，月上野煙開。
殿角垂星漢，林心擁石臺。
坐中誰問偈，秋色萬峯迴。

偶作

物情都掩面，時政偶驚心。
君父恩兼重，冠裳慮轉深。
諸臣安放逐，萬態總浮沈。
自幸同麋鹿，棲遲在茂林。

秋日湖上雜詠六首

湖水秋仍漲，鷗羣日以親。
歲時諸酒伴，身世一漁人。
擊汰峯紋亂，凌空月魄新。
山川從所適，但醉莫言貧。

其二

野望晴偏好江行晚故幽總於朝市遠散盡古今愁
鳥鴈紛前渚蒹葭忽蚤秋由來范夫子先繫五湖舟

其三

鷺立湖心石魚吹浦口莎數峯排霧出一葦信風過
落日殘紅蓼新霜變綠荷客星從耿耿無復照煙蓑

其四

棄擲身偏穩行遊性頗真棹隨城宛轉波湧石嶙峋
樹裏千家暝雲邊百雉新芙蓉行自采秋水故精神

其五

謝客安離索招攜但酒徒霜林森橘柚雪浪隱菰蒲
不減歸吳興如披入剡圖一樽歌裏盡百感醉中無

其六

爲愛湖光好朝朝坐不歸環山皆酒案得石定漁磯
露下青菱熟天空赤鴈飛流年莽推斥莫惜典吾衣
與茂承夜談

不憚長江險相求到石門九秋寒雨夜千里故人樽
放逐偏吾道漁樵竝主恩歡來病欲去萬事莫須
論

輓許長公二首

試問新都士誰賢許長公賈行然諾重儒術孝廉同
有子堪商鼎無家類楚弓祇今冠蓋里猶憶古人風

其二

吳越游揚後家傳長者名可知鹽筴地不盡布衣情
讓宅存高義違時見獨行誰云褒德詔只作夜臺榮

喜孫兆孺過訪

風雨秋期暮君來自洞庭豈從真隱處猶測少微星
短髮驚相弔深杯喜莫停放歌俱楚調流響入青冥

呂相國枉過小宴

大道衣冠集爭迎上相歸何當紆屬駕先自訪巖扉

野服寒蘿薛山盤進蕨薇一樽申契闊花鳥亦忘機
謁相國新第坐間成詩

移疾下黃閣卜居巢白雲完名周大老軼迹漢元勳
異饌中厨出天香內苑分不煩誇綠野佳氣鬱氤氳

植檜

帶雨移雙檜培之藥圃中短梢新出檻密刺已成叢
不受風霜色真於栝柏同怪來河上老先植太清宮
植紫荊

尋常紫荊樹花葉一何稠愛爾宜兄弟移之共息遊
陰連雲氣合香挹露華幽蕭灑江淹頌含毫未易酬

植女貞木

一名冬青

爲愛華林種雙株手自移
試看羣卉色誰比萬年枝
映雪浮蒼靄先春發異姿
從來貞女意獨有歲寒知

初夏文錦閣對雨二首

晏起臨孤閣軒空暑氣清
湖添新水漲峯入亂雲平
薜荔高連屋魚龍近狎城
雨中芳樹色流睇不勝情

其二

古木寒煙集方塘野水侵
積陰常蔽日環堵自愁霖
黯澹憐芳草微茫辨遠岑
樓居一高視天地總浮沈

王行父同廖珍之君直俞本之見過文木園小

飲時兩兒在侍行父有作賦此和之二首

小徑偏佳客初筵但濁醪石隨簾出沒花與席週遭
共戀朱明景兼聞白雪操病夫先怯醉投轄任兒曹

其二

自喜逃名去何期間字來辟人甘學圃留客與登臺
花石供幽興風雲待異才侍童諳楚曲聊以送餘杯
夏日同莊則勸程萬里暮泛北湖

五月仍春服江平雨乍收客懷殊放浪山意亦遲留
遠樹移新月輕雲送白鷗不知人世裏何物勝滄洲
與則勸萬里飲石蘭橋

欲覓浮觴處村流澗見侵且憑橋石醉更覺野情深
片雨懸高隴飛泉出茂林不煩操綠綺二妙已知音
讀羽王萍浮集因贈四詩

樗散從人棄萍浮奈爾何官馮遷謫老詩藉水雲多
不是憐同病誰當屬和歌世情虛按劍此物竟差叢

其二

莫怪張平子清時更四愁由來千古意只博十年流
得句安貧病無家感去留秭林誰伯仲澤畔好相求

其三

海內論騷雅瓊瑜總見珍時名多後輩古意獨斯人

倚馬工無敵，雕龍捷有神。已能驚象緯，不必畫麒麟。

其四

駿骨虛高價，羊腸自畏途。枕書長日靜，吹劍落星孤。
武庫才難盡，文園病未蘇。令名兼達宦，須信古來無。
晚過通真觀訪載道

愛此斜陽色，偏於雨外驕。膜煙澄古觀，霞彩霽長橋。
水擁金銀闕，山披雲霧綃。正須吾與爾，掃石話漁樵。
仲將明府自山莊移居西郭外不遠見客作此

簡之

巾車已入市，猶自厭逢迎。背郭新營舍，臨流便濯纓。

官貧餘舊業機息悟浮名
花底盈樽酒何時共汝傾
同徐懋誠飲石薜亭作

園荒久不涉花落漸無多
與客攜樽入驚秋奈老何
薜痕侵戶牖蛛網蔽藤蘿
只似行吟處重聞孺子歌
視仲將病歸而有感貽之二詩

劉郎何自苦陋室引荒藤
據榻形相弔披衣骨未勝
有家仍逆旅無定亦禪僧
白首同袍者淒然百感增

其二

吾黨奇男子遨遊歷大方
歸來甘抱膝何事不迴腸
倚劒終難奮調琴祇自傷
至人齊物理千慮且須忘

惠上人繕造上方寺成自姑蘇來乞詩因贈二

首

緇衣叩巖屋云是上方僧錫卓東吳勝經傳外域燈
遂能開二梵無用品三乘一水杯堪度飄飄共汝登

其二

倚雲新梵閣清暑故吳宮海色旃檀外經聲縹緲中
乞碑留偈好開卷臥遊同未入青蓮社招攜仗遠公
同楊張二使君登東城樓

城頭水漸落荻外峯全明寒日下洲渚北風吹杜蘅
登樓一以望對酒不勝情何處起雙鴈當窻流楚聲

送俞本之下第還姑蘇

適楚名難遂，歸吳計轉貧。
霜風飄短褐，雪浪擁前津。
況是悲秋日，偏憐泣路人。
停舟不一醉，何以慰交親。

送楊仁父使君入

覲

夙駕朝元會，明堂直北開。
衣冠羣后集，玉帛萬方來。
應嶽呼天壽，臨軒寵異才。
便應簪筆侍，寧獨賜金回。

同羽王攜酒邀汪方二山人泛舟二首

載酒出林垞，江光忽杳冥。
旋移青雀舫，故近白鷗汀。
野景殊難敵，深杯莫放停。
坐看山霧暝，波上湧羣星。

其二

城居忽不適雲水一追歡却借羣山色聊供二客看
淺沙分燕口高岸束鴉灘蕩漾舟前月真疑夜雪寒
通真觀訪惟一因與步過北園

小圃隣仙院平分野色幽偶攜蓬觀客來作竹林遊
蹊逕填丹葉茅茨帶碧流無須著亭榭已可當玄洲
爲汪伯玉司馬悼其太夫人二首

省覲私明詔丘園藉主恩板輿方動色桐杖忽銷魂
愛日腸應斷終天骨僅存向來噬指意灑血與誰論
其二

象服山河竝蠶宮禮數優承歡羅鼎俎獻壽走王侯

發隕蘭閨夕風生總帳秋升堂吾已晚何日拜松楸

冬日與仲美對菊

菊花何大傲歲晚獨含英一夜迎寒發繁香遶屋清
却持霜後色來助酒邊情醉眼仍相媚流光忽自驚
種花

十月氣尚暖移花自近村細鋤疏地脉深灌及雲根
密葉肯連榻脩藜綠映樽間居賦中景不忝在吾門
題孔陽宗侯依隱亭

公子憶趨庭蕭然抱一經念從高士里曾結此君亭
室故留虛白名將託汗青渭川千畝色入望總儀刑

題熊汝端茂才書室

鄂縣中丞里貽謀屬象賢經營西塞麓坐臥鸞熊編
自悟虛生白因之靜草玄江深雲氣擁應抱伏龍眠
人日酬王行父問遺

新年苦風雪七日未知春偶起看梅柳蕭然傍隱淪
音書渾報玉酒脯亦分珍一水遙相望江雲故故新
酬陳在璞二首

在璞南海人故爲文學時遇予鍾陵道中以
詩見投定交而別今蓋十五年矣予已被放
歸田間而在璞適佐永州頃自永州遣使浮

洞庭而下凡二千餘里來致問遺兼贈二律
予感其意因用來體酬之

南州一傾蓋岐路各風煙喜我還山日逢君仕楚年
文從蟻室著書度鴈峯傳不是心同臭那能遠見憐

其二

信使來何遠林間叩薜蘿休分營道米舟狎洞庭波
郡閣雲山僻詞場意氣多瀟湘只一水脉脉奈愁何
閱羽王過江集悲感成詩得四首

爲覽涉江賦深悲行路難量移趨上國何事繫南冠
一語飛相厄三驅忽見寬只餘雙涕淚沾灑朔雲寒

其二

天塹雄南北嗟君數往來詩存江上草心死獄中灰
卽有全軀幸寧忘別足哀投荒萬里外何物解憐才

其三

結舌安流播傷心飽亂離客程懸鳥道妻子託鷄枝
氣盡逢誰吐詩成祇自悲 賜環恩未報那敢學鴟
夷

其四

燕臺招士日梁獄上書辰斧鑕留疆項風波穩側身
頗疑詩作祟莫怪老增貧屈賈原無罪千秋自逐臣

邵子俊見訪

骯髒毘陵客無家滯鄂城字能工小篆詩欲變新聲
訪戴舟何遠千齊缺未鳴問奇無所有聊與一樽傾

送子俊遊梁

解榻正歡晤擔簦復遠遊看花過菟苑訪古入高丘
雪月梁王簡風霜季子裘能無知己遇雙壁向君投

胡載道攜其子伯良見過

春雨何曾歇春花都未開坐憐韶景盡猶喜故人來
久客誰同調攜兒亦異才山城兼味少葵藿薦深杯

與伯良

年少胡家驥聞詩自若翁一寒殊不厭諸體漸能工
辟地哀王粲忘年交孔融游揚總未適所志在冥鴻
羽王移息東署見招同求叔夜飲

繫匏官不調懸磬室頻移且寄滄洲與同傾濁酒卮
曾城起織月古柏動涼颺客有題鸚鵡披襟思益奇
家兄宅同呂章伯叔俞敦甫劉世觀暨兒工
良對花小飲醉中作

不忝連枝會親交喜共攀涼生花雨後歌入水雲間
好鳥鳴深樹飛霞宿遠山斯情況斯景取醉莫言還
宿楓林寺

竹塢新停雨，楓林未受霜。門延青嶂入，寺與白雲藏。
細籟調清梵，輕煙吐妙香。總於人境絕，高枕悟明光。

送侯少叅分守湖南二首

古道沈淪久，何圖復見君。赤心渾自照，丹漆本無文。
雨露千家足，謳歌列郡聞。明廷恩澤詔，萬里下江濱。

其二

向來名御史，簪筆侍楓宸。一涉江湖道，爭憐社稷臣。
帝鄉馮保障，蠻府受經綸。莫訝旬宣遠，應酬寵命新。

舟夜聞鴈有懷

寒鴈起何處悲鳴夜未休已忘關塞遠猶畏網羅求
江樹隱微月野雲平古丘潸然思舊侶天地一漁舟

晚過南城潭

緩撥沙邊棹貪看雪後山柳縈荒堞暗河逐大隄
出沒林扉亂浮沈水鳥閒晚風吹片席安穩逆流還
揚使君攜酒枉過北園

學圃安吾拙何當遇使君紆車臨水石載酒醉松雲
野色孤亭合林霏一鏡分只憐侵坐處梅落故紛紛

吳叔嘉至

問君何所慕千里犯江濤不自安吳語相將學楚騷

掃雲留下榻，巖石待揮毫。勿復嗟貧病，銜杯助爾豪。
讀羽王東漕集悲感成二詩

白下饒山水，君行更舊遊。那知佳麗景，偏結古今愁。
末路身難側，清時淚未收。轍鱗思縱壑，誰爲決江流。

其二

念爾將漕去，逡巡謁大農。一官從覲屈，羣態迫龍鍾。
恥受倉曹識，寧爲委吏容。行藏誰自計，杯酒托浮蹤。
送季子無傷赴武昌應校二首

一藝何堪錄，憐當十五時。逡巡里選特，達冒羣疑。
小試青雲器，常含玉樹姿。許身先孝友，母忝丈夫兒。

其二

江夏先賢傳黃香與孟宗孝哉吾所慕行矣汝須從
不易三公鼎堪銘萬石鐘 聖朝需國士寧獨幸遭

逢

冬日遷葬先大夫暨先恭人于蓮花山張使君

同諸文學官并諸鄉大夫枉過會送志感四

首

負土營新兆穿泉築夜臺山川重託體雲日總銜哀
弔客爲堪東行塋櫬可材平林飛蓋出誰策素車來

其二

爲藉烏經術新移馬麓封容棺開石窆豎碣表雲峯
客聚疑觀禮予衰信毀容可憐垂老夢時與二親逢
其三

野徑鳴騶過傳呼到使君言修會葬禮親勒挽歌文
山奪芙蓉秀杯浮秬鬯薰憐予淪落久何以報慇勤
其四

二老俱裘褐天書晚見褻慚無嘉績奏只錄義方勞
尺土規羣象前山駕六輦倚廬謝賓客雙淚濕蓬蒿
阮汝真過訪留酌

素交殊不薄垂老劇相憐爲赴看山約時停上瀨船

濁醪堪累夕華髮任餘年世眼無青白誰知阮籍賢

龐甌洞蒙卷之十六終